

आकाशवाणी

पैहले खास-खास खबरां:-

1. प्रधानमंत्री नरेन्द्र मोदी हों पच्छिम एशिया दी स्थिति गी ध्यानै च रखदे होई देशवासियें गी अपील कीती ऐ कि ओ अपने संसाधनें दा सलीके ते सर्फे सिर इस्तमाल करन। जागरुक समाज दी इस गुजारश पर सकारात्मक प्रतिक्रिया।
2. बी.जे.पी. दे सीनियर लीडर हिंमत बिस्वसरमा अज्ज गोवाहाटी च असम दे मुखमंत्री दे तौरा पर संगंध चुक्कगंन।
3. ई.डी नै पच्छिम बंगाल च दक्खनी डमडम नगरपालिका भर्थी घोटाले च साबका मंत्री सुजीत बसु हों'गी गिरफ्तार करी लैता ऐ।
4. प्रधानमंत्री नरेन्द्र मोदी UAE-नीदरलैंड -स्वीडन- नारवे ते इटली दे 6एं दिनें दे दौरे पर जा'रदे न।
5. अमरीकी राष्ट्रपति डोनाल्ड ट्रम्प हों आखेआ ऐ ईरान कन्नै संघर्ष विराम समझौता अपने खीरी साह लै करदा ऐ।
6. बंगलादेश च क्रिकेट टीम दे भारत च आई.सी.सी. टी-20 विश्वकप सवा हटने दे कारणों दी जांच लेई त्रै-मिम्बरी जांच कमेटी दा गठन कीता गया ऐ।

<><><><><><>

PM-West Asia Crises

प्रधानमंत्री नरेन्द्र मोदी हुंदे आसेया पच्छिम एशिया दे ताजा हालात दे चलदे देशवासियें गी अपने संसाधनें-वसीलें दा सलीके ते सर्फे नै इस्तमाल करने दी अपील दा आम तौरा

पर सकारात्मक असर दिक्खने गी लब्बा रदा ऐ। जागरुक समाज इस गल्लै गी समझै करदा ऐ कि चुनौती दी इस घड़ी च अपने देश दे हितै च सब्भनें गी इक-मिक्क होइयै खड़ोने दी लोड़ ऐ- जिया जे पैहले बी खबर दिती जाई चुकी दी ऐ कि जंदे रोज प्रधानमंत्री नरेंद्र मोदी होरें पच्छिम एशिया च जारी तनोतनी दे चलदे पैदा होई दिएं कुल संसारी जक्कोतक्की आली परिस्थितिएं दा मकाबला करने ते आर्थिक आत्मनिर्भरता लेई देशवासिं कोला विशेष सहयोग मंगेआ हा ते अपील कीती ही जे देशहित च अपनी जीवनशैली च बदलाव आहनन। तेलंगाना च इक जनसभा गी संबोधित करदे होई मोदी होरें आखेआ हा कि पेट्रोल, डीजल दा सर्फे ते सलीके सिर इस्तेमाल कीता जा। घट्टोघट्ट इक बरे धोड़ी सुन्ना नेई खरीदेआ जा ते ईंधन बचाने लेई कोविड काल आंगर समाधान बैठका लाने दे बजाय आनलाइन या वर्चुअल ढंगे नै ते वर्क फ्राम होम जनेए विकल्पे गी चुनेआ जा। मोदी होरें कारपूलिंग अपनाने, अपनी गड्डी च जाने दे बजाय सार्वजनिक ट्रांसपोर्ट ते मेट्रो बगैरा दा इस्तेमाल करने ते डीजल पेट्रोल आहली गड्डिं दे बजाय इलेक्ट्रिक गड्डिं दा इस्तेमाल करने लेई बी आखेआ। मोदी होरें मुखे दे तैयार उत्पादे दा इस्तेमाल करने ते रसैनी हैलें दी थाहर देसी हैलें दा इस्तेमाल करने पर बी जोर दिता ऐ।

<><><><><><>

Assam –CM Swearing

भारतीय जनता पार्टी दे सीनियर लीडर हिमंत बिस्वा सरमा अज्ज दुई बारी असम दे मुखमंत्री दे ओहदे दी संगध लैंगन- उन्दे कन्नै 4 मंत्री बी संगंध लैंगन- जिंदे च दंडु बी.जे.पी. ते 1-1 सहयोगी दल असम गण परिषद ते बोडोलैंड पीपल्स फ्रंट दे होगंन।

गोहाटी दे खानपाड़ा इलाके च स्थित वैटनरी कालेज दे खेड्ढ मैदान च लग्गने आहले शपथ ग्रैहण समारोह च राज्यपाल लक्ष्मण प्रसाद आचार्य होर उनें'गी ओहदे ते राजदारी दी सगंध चुकागंन। हिंमत बिस्वा सरमा होरें इक सोशल मीडिया पोस्ट च दस्सेआ ऐ कि बी.जे.पी. दे सीनियर लीडर रणजीत कुमार दास विधानसभा अध्यक्ष दे ओहदे लेई NDA दे मेदवार होगंन। शपथ ग्रैहण समारोह च प्रधानमंत्री नरेन्द्र मोदी- रक्षामंत्री राजनाथ सिंह- गृहमंत्री अमित शाह- केन्द्र खजाना मंत्री निर्मला सीतारमण- BJP अध्यक्ष नितिन नबीन ते NDA शासत राज्ये दे मुखमंत्री ते उपमुखमंत्री बी शामिल होगंन।

<><><><><><>

Gadkari Toll System

सड़क, ट्रांसपोर्ट ते जरनैली शिडकें सरबंधी मंत्री नितिन गडकरी होरें आखेआ ऐ कि मल्टी लेन फ्री फ्लो टोल बवस्था शुरू होने दे कन्नै गै भारत नै टेकनालजी आधारित जरनैली शिडकं दे प्रबंधन दे इक नमें युग च प्रवेश करी लैते दा ऐ। अज्ज नमीं दिल्ली दे मुडंका बकरवाला टोल प्लाजा पर इस उन्नत बवस्था दा उद्घाटन करदे होई आखेआ जे पैहले कन्नै टोल प्लाजा पर लग्गने आहले चिर दी समस्या खत्म होई जाहग ते प्रदूषण, तेल, पेट्रोल दी बर्बादी ते टैम जाया होने दी समस्या बी खत्म होई जाहग। गडकरी होरें आखेआ कि मल्टी लेन फ्री फ्लो दी सुविधा कन्नै 285 करोड़ रपे दे ईंधन दी बचत होग ते हर बरे 81 ज्हार टन कार्बन डायआक्साइड उत्सर्जन च कमी औग। उनें आखेआ कि इस प्रणाली कन्नै गड्डीएं गी विजन रोके टोल वसूल कीता जाई सकदा ऐ ते फास्टटैग, आटोमैटिक नंबर प्लेट पंछान तकनीक ते आर्टिफिशल

इंटेलीजेंस पर आधारित कैमरें दा इस्तेमाल होंदा ऐ। एहदे नै टोल प्लाजा चलाने पर लागत जेड़ी पैहली वसूली दी 15 प्रतिशत होंदी ही, हून दड़ी 3 या 4 प्रतिशत रेही जाहग।

<><><><><><>

ED-Ex. Min Arrested

माली नियम लागू करने आहले निदेशालय ई.डी. नै पच्छिम बंगाल च दक्खनी डमडम नगरपालिका भर्थी घोटाले च साबका मंत्री सुजीत बसु होरें'गी कोलकाता सवां गिरफ्तार करी लैता ऐ। ई.डी. नै दस्सेआ ऐ कि तृणमूल कांग्रेस दे शासनकाल च सुजीत बसु होरें नगर-पालिका च बक्ख-बक्ख ओहदें लेई कथित तौरा पर कोई 150 मेदवारें दी सफारश कीती ही। ई.डी. नै नौकरी देने दे बदले कथित तौरा पर फ्लैट दी मंग करने दे अपराध दा बी पता लाया ऐ। एजेंसी दा आक्खना ऐ कि उसी बसु हुंदे बैंक खातें च भारी रकमें दे जमा होने दे बी सबूत थोए न। बसु होरें'गी अज्ज बड्डलै विशेष अदालतें च पेश कीता जाहग।

<><><><><><>

PM- UAE Visit

प्रधानमंत्री नरेन्द्र मोदी होर शुक्रवारें सोआ संयुक्त अरब अमीरात - नीदरलैंड- Sweden- Norway ते इटली दे 6एं दिनें दे दौरें पर जा करदे न। 5 मुखें दे अपने दौरें दे पहले गेड़ च मोदी होर शुक्रवारें संयुक्त अरब अमीरात पुजगंन जित्थे ओह राष्ट्रपति शेख मोहम्मद बिन ज़ायद अल नाहयान हुंदे कन्नै मलाटी करडन। दौने नेता दपक्खी मामलें- खासतौरा पर ऊर्जा सहयोग दे कन्नो-कन्नी आपसी हित ते इलाकाई ते

अंतराष्ट्रीय मुद्दें पर वचार-विमर्श करडन। एदे इलावा ओह मजबूत सियासी-सांस्कृतिक- आर्थिक ते लोकें बश्कार राबते राहें दपक्खी व्यापक रणनीतिक सांझ-भ्याली गी अगड़े बधाने दे तौर-तरीकें पर बी चर्चा करगंन।

<><><><><><>

US-Prez Ceasefire

अमरीका दे राष्ट्रपति डोनाल्ड ट्रम्प होरें आखेआ ऐ जे ईरान कन्नै युद्धविराम बड़ी कमजोर स्थिति च ऐ। व्हाईट हाउस च पत्रकारें कन्नै गल्लबात च ट्रम्प होरें आखेआ जे ईरान आसेया भेजे गेदे प्रस्ताव गी उ'नें सिरे थमां खारिज करी दिता ऐ। राष्ट्रपति ट्रम्प होरें आखेआ जे ईरान दी प्रतिक्रिया कन्नै युद्धविराम दी स्थिति होर कमजोर होई ऐ। उ'नें दस्सेया जे ईरान मुद्दें पर उन्दी शीर्ष सैन्य अधिकारियें कन्नै महत्वपूर्ण बैठक बी होई। ध्यानजोग ऐ जे ईरान कन्नै 28 फरवरी थमां जारी संघर्ष दे कारण वैश्विक तेल आपूर्ति प्रभावत होई ऐ- जेहदे कन्नै केई देसैं च ईंधन संकट दी स्थिति पैदा होई ऐ।

तौंआई अमरीका ते ईरान बश्कार कमजोर संघर्ष विराम दे Life Support पर होने दे राष्ट्रपति डोनाल्ड ट्रम्प दी टिप्पणी मगरा राजनयिक तनाs गहरा होई गेआ ऐ ते तेल बजारें गी झटका लग्गा ऐ। कन्नै गै स्थाई शांति ब्हाल होने दे असार बी मते घट्ट रेही गेदे न।

<><><><><><>

Bangladesh Cricket

बंगलादेश च क्रिकेट टीम दे भारत च ICC T-20 विश्व कप संवा हटने दे कारणों दी जांच लेई त्रै मिम्बरी जांच कमेटी दा गठन कीता गोआ ऐ। 10 मई गी जारी अधिकारिक हुकमै मुजब साबका अप्पर सचिव डाक्टर ए.के.एम.अली उल्ला समीति ते अध्यक्ष होगंन। समीति च बंगलादेश क्रिकेट टीम दे साबका कप्तान ते मजूदा चीफ सलैक्टर हबीबुल बशर ते सुप्रीम कोर्ट दे वकील फैसल दस्तगीर बी शामिल न। कमेटी गी इस सिलसिले च 15एं दिनें दे अंदर-अंदर जवाब देने लेई आखेआ गोदा ऐ। बंगलादेश नै सुरक्षा कारणों दे चलदे भारत औने सवा बंगलादेश क्रिकेट बोर्ड दे इंकार दे बाद भारत ते श्रीलंका दी मेजबानी च आयोजित टी-20 विश्व कप सवां नां वापस लेई लेता हा।

<><><><><><>

IPL

आई.पी.एल. क्रिकेट च कल दिल्ली कैपिटल्स नै पंजाब किंग्स गी 3 विकेटें कन्नै हराई दिता। 211 रन्जे दे लक्ष्य दा पिच्छा करदे होई दिल्ली कैपिटल्स नै 19 ओवरें च 7 विकेटें पर 216 रन्ज बनाइयै मैच जिती लैता। कप्तान अक्षर पटेल नै 56 ते डेविड मिल्लर नै 51 रन्ज दी पारी खेड्डी। एहदे शा पैहले पंजाब किंग्स नै तय 20 ओवरे च 5 विकेटें पर 210 रन्ज बनाए हे। तौंआई अज्ज गुजरात टाइटन्स दा मुकाबला सनराईजर्स हैदराबाद कन्नै होग। मैच संजा साड्डे 7 बजे सोआ अहमदाबाद दे नरेन्द्र मोदी स्टेडियम च खेडेया जाहग।

<><><><><><>

Fact Check Op. Sindoor

सरकार नै सोशल मीडिया पर प्रसारत होआरदे उस वीडियो दा खंडन कीता ऐ जेहदे च दावा कीता जा'रदा ऐ कि वाइस एडमिरल ए.एन प्रमोद होरें आखेआ ऐ कि आप्रेशन सिंदूर दे दरान पाकिस्तान नै भारती जहाजें ते ब्हाई अड्डें गी नशाना बनाया हा। पत्र सूचना ब्यूरो पी.आई.बी दी तत्थ जांच इकाई नै इस दावे गी फर्जी करार दित्ता ऐ। पी.आई.बी नै जांच मगरा पता लाया ऐ कि एह वीडियो पाकिस्तानी नेटवर्क आसेआ डिजिटल तरीके नै एडट करियै लोकेँ गी गुमराह करने दी मंशा कन्ने तैयार कीता गेदा ऐ। इस चाल्ली होर बी केई वीडियो इनेँ दिनेँ सोशल मीडिया पर वायरल होआ करदे न जिंदे च पाकिस्तानी प्रोपगेंडा गी फैलाने लेई केई चाल्ली दे झूट ते गुमराह करने आहली जानकारी फैलाई जा करदी ऐ। फैक्ट चैक दे बाद पी.आई.बी नै आखेआ ऐ कि वाइय एडमिरल होरें ऐसा कोई बयान नेई दित्ता ऐ। पीआईबी नै आम लोकेँ गी सलाह दिती ऐ जे ओह ऐसे वीडियो पर भरोसा नेई करन ते नां गै इनेँगी अग्गे फारवर्ड करन।

<><><><><><>